


A Monthly Christian Magazine

AN ORGAN OF THE ZOU PRESBYTERIAN CHURCH SYNOD

# Khristian Tangkou

Vol. 56 || No. 10

October 2020



Editor: Rev. Khamchinkhai

Synod Kumpuon:

Thukhenna dih leh dihtatna khu tui bang in luong hen (Amos 5:24)

# Khristian Tangkou

Vol. No. 56 || Issue No. 10 || October, 2020

# A sung thu

## Editorial Board

Editor	:	Rev. Khamchinkhai	- 8730933744
Joint Editor	:	Rev. Dr. Hangpi Maunlun	- 9862910875
Cir. Manager	:	Upa Jamsiamnung	- 9862086615
Bus. Manager	:	Upa Kamgenpau	- 8974612937
		Ms. Niangkhamhang	
		Miss Tracy Niangsuanuam	
Cont. Editors	:	Upa Khupsuankham	- 9856406454
		Rev. Awnkhankhup	- 9862828921
		Rev. Thangboi Khuongsai	- 8119957887
		Rev. Khamminlian	- 8414998542
		Rev. P. Ginzalal	- 8131814376
		Upa Dr. M. Lachinkhai	
		Upa Jamgenthang	
		Upa M. Lianminthang	

## ZOU SYNOD ULIENTE

- **Moderator:**  
Rev. Zamlianpau
- **Moderator Elect:**  
Rev. Kapsuanthang
- **Secretary (Sr):**  
Upa Kapkhanthang
- **Secretary (Jr):**  
Upa M. Kamzadou
- **Treasurer:**  
Upa M. Sianzahau
- **Statistician:**  
Upa Shanti Kumar
- **Executive Secretaries:**  
Rev. Khamchinkhai  
Rev. Dr. Hangpi Manlun

Copies - 1200

### AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

- Editorial..... 01
- Thu tuomtuom & Thumpi ding ..... 02
- Khanglaite Jesu Khrist a ding in.... 03
- MADASA..... 08
- Innkuon ..... 09
- Jesu en zing vai ..... 12
- Sun zah masang in ..... 16
- Mangpa kung ah kile kia vai ..... 21
- ZPWF Column ..... 24

Thusuo zosie Editor leh Zou Synod ngaidan ahi kimsih a, suotute'n maw a kipuoh chiet ding uhi.

Thusuo dingte Editor kung a pieh ding ahi.



**m** ANGPA PASIAN mapuina zal in kum 2020 September (Sepguol ha) mang zou a i um tah zieh un Mangpa min i phat masa uhi.

I nua March ha tawp lam apat in Covid-19 zieh in mipi kipunkhawmna um theilou in Biehinn kaite bang a kithul a, hinanleh Sepguol ha pen innsuon chin vena a hun lemtang a la in a bawl thei tan in i bawl chiet ua, kipah a um mama hi.

Awle U-le-nau, maban i kalsuon zelna ding uah Covid-19 ziehin Lock Down kihakol nanleh zah leh zui ding (dan-le-dun) a um a, nang leh kei in tami dante hoitah a zui in mimal, innsung, veng sung, Hattuom sung ah zong mang chiet ding in i kideisah un i kingen uhi.

October ha District level ah PYF, PWF leh District Khawmpum tou zel ding ahia, District chinten vaihawmna bangkim Pasian muong kawm a hawm thei ding in Pasian in hing pui chiet hen.

Hun sawt kuomtah vaiguon Pasian bieh piehna ahon a i nei theilou lai in tu in a khomkhom a nei ding ihi tahna tung uah i nei theilou lai te thasietpi ahilouleh zongsahpi lou ding in hattuom mite i kingen un i kichiel sawnsawn uhi.

Maban ah bang hing tung ding ahiei chi ngaituo kawmkawm in Pasian toh zawkhawm in gin-um tah in hinkhuo mang chiet va ui.

Simtute zousie Mangpan hing umpi chietta hen.

# Thu tuomtuom leh Thumpi dingte



- 1). Kum china a i na bawl bangun kum 2021 Zou Synod Calendar bawlzaw ahita a, adeiten Rs. 20-in Synod office ah leithei zing ahi.
- 2). Tuivai kuol PYF-te vaisaina in a peisa September 14-20, sung teng solfa training Lunzang khuo ah Tv. Langkhen lamkai (instructor)-na nuoi ah nei uhi. Tuachin, Executive Secretary i/c Music lamkai in vena zong vanei uhi.
- 3). Theological Committee in i Synod huong sung a private a Senate of Serampore affiliated colleges nuai a Bible zilte kung ah book grant in Rs. 3000 (sangthum)- chiet pie hi.
- 4). Apeisa dated 18, September ni in, “64<sup>th</sup> General Conference a ding competition booklet” honna leh latna Executive Secretary i/c Youth in nei in unite kungah zong hawmkhieh ahi.
- 5). Kum chin a inei bang un tukum khanglai day 30<sup>th</sup> August khu local chinin eima lemtan bang un lawching tahin i mang zou uhi. Ahin, khopi sung a um hattuomten i gam ua covid-19, ziehin kineithei lou hi. Ahin, office lam apatin tuami ni in, zingmong leh nitahin Khanglai day message Executive Secretary i/c Youth in Pasian thutah genna **“Synod Youtube”** ah nei hi. Tuabanah, sun laiin, PYF Lamka districtte in Gospel movies, “Keiman Khawldamna hing pe vang” chi abawl uh zong hakchiehna kinei hi.

- 6). Zou Presbyterian Church Shillongte apeisa dated 20<sup>th</sup> September niin bielu MLA Pu. Lambor in vena vanei in dangka Rs. 30,000 (sang sawmthum) zong i hattuomte va pie hi.



**TUIVAI DISTRICT PYF SOLFA CAMP 2020**

.....

## **KHANGLAITE JESU KRIST A DIING IN**

*Pastor Khai Minthang  
Zo Presbyterian Church,  
Atlanta, USA*

“Tam thupiehte pie inlen zilsah in: Na naupanna Koima’n simmaw sih heh, hinanleh hamkam suoh ah, gamtat dan ah, itna lam ah, hagau lam ah, ginna lam ah, sienthouna lamah, gingtute etton ding hi zawin.” (I Timothy 4: 11-16).

1). THUPATNA: Khanglaite khu ataangpi a gen in kum 14 apat in kum 35 tan veel hi diing ngaituo thei hi. Presbyterian Hattuom dan in khanglai kichite khu kum 14-40 kikaalte ahi uhi. Hilezong, mi tamzawte ngaidan in khanglaite khu kum 14 tuom apat zinei masangta’n chi ahi. Bangtenghileh, “Khanglaite” kichi chienga ama

lungsim a “Kei zong khanglai kahi” kichi theite zosie khu khanglai himai leh hoiva kachi a, tuadan ngaituo jou nawnloute khu naupang, khanghaam leh teebsie ahita uh chilei a kilem in igen nuompen tawh a kituoh zaw diing in ka ngaituo hi. I naupanlai apata inu leh pate’n ang etkol uh ahia, tutan ang etkol zing nalai uh ahia, eite tha neeh kaal a ngahla mama uhi. Laphuotu khat in, “Bawi aw hing khang mengmeng aw, pam a tuoit dawng hing bang aw, pama tuoit dawng nangbah chieng, nu tha heng aw pa tha heng aw, bawi aw e!” achi hi. I laa kidemna in “Khanglai na zaitha ahat e, leitung pahbang hi chi thei in” chi hi. Khatpen ah, “Na pallai hun manpha hi; na sana khang ahi. Na vanglien liibang ching in, kamkei bang in saleng. Lei nopsahna leh kipahnhan zanglou in, midangte din zang in na pallai ni. Na pallai hun abei ma’n, na zaitha tawldamma din, Tung Sienmang di’n sem in aw” chi ngetngut hi. (Eccl. 11:9 apat 12:1-7 sim in).

2). KHANGLAI TIMOTHY: Paul in Timothy a thuhilna ah a khanglai nite khu “Koima’n simmaw sih heh, hinanleh hamkam suoh ah, gamtat dan ah, itna lam ah, hagau lam ah, ginna lam ah, sienthouna lamah,

gingtute etton ding hi zaw in” chi hi. Mite simmaw lou a, mite etton diingte khu:

1). Hamkam suoh ah – Kam dam, kam hum chite zah diing – hepинatawh, lungdam, chite zah diing ah. 2). Gamtatdan ah – Nule-pa leh tungsiete zatatdan siem, gamtat-khohei kilawm diing ahi. 3). Itna lam ah – Itna lahsahna chilbawl lou diing, Pasian, ih mihinpit leh gamhingte leh sing-le-loute ittna nei diing ahi. 4). Hagau lam ah – Pasian thu lungngai diing, piengtha diing, Pasian a masa a koi den diing ahi. 5). Ginna lam ah – Ginna (upna) tawh kalsuon diing, Pasian kung a kinga leh Athu umte hi diing ahi. 6). Sienthouna lam ah – Tahsa leh lungsim sienthouna nei diing. Sienthouna lou in koima’n Pasian mu theilou hi Tambangteng ah khanglaite mite simmawna umlou a, mite etton thei diing a um diing ihi uhi.

3). KHANGLAI MISSIONARY-TE: Tam aney a khanglaite’n leitung nopsahna sang in Pasian a diing in kipekhie in, a innsung leh gamsung nopsahna sang in Pasian theilou mite kung ah missionary in kuonkhie uhi. A khanglai hun hoi laitah uh Pasian pie uhi. Tam khanglaite zieh in Pasian in agam uh guolzawl in, thupha pie hi.

Ama uhte:

1). Jesus Christ, the Messiah (Circa. 3 – 33 AD), Ih Hundampa Mangpa Jesu Krist in ministry apat in kum 30 veel a upa ahi.  
2). David Brainerd (1718-1747), Haddam, United States. 1743 a Native American-te kung a missionary apei in kum 25 a upa ahi hi.  
3). William Carey (1760-1834) Paulerspury, United Kingdom. 1793 a India a missionary apei in kum 33 a upa ahi hi.  
4). Adoniram Judson (1788-1850) Malden, United States. 1812 a Burma a missionary apei in kum 24 a upa ahi hi.  
5). Hudson Tayler (1832-1905). Barnsley, United Kingdom. 1854 a China a missionary apei in kum 22 a upa ahi hi.  
6). Mary Slessor (1848-1915). Aberdeen, Scotland. 1876 a Nigeria a missionary apei in kum 28 a upa ahi.  
7). Missionary JH Cope (11/21/1882 – 6/11/1938) khu 1908 a Burma ang pei in kum 26 a upa ahi.  
8). Missionary Watkins Roberts (9/21/1886 – 4/20/1969) khu December 1908 a India ang pei in kum 22 a upa ahi hi.

3). PASIAN SIMMAWTE LEHA SHIDAN UH: Leitung a adamlai ua minthang mama, Pasian deilou leh chiemmuibawl mi bangza ekhatte thugen leh a shidan uh envai:

1). Thomas Andrews (1873-1912): Titanic long bawlpa chia kiminvaw, longpi bawlsiem mamapa in Royal Mail Ship Titanic longpi kibawldan ah kingam seng in, thutha saite (reporter) khat in Titanic ngamhuoidan adoh lai in awsuo khautah in “Pasian in zong tumsah jou sih va” (Not even God can sink it) achi hi. April 1912 in vuakhal phukha in a longpi tui a atum gentahlou mihing 1500 te hinna mangthang a, Thomas Andrews luong kimu nawnlou hi. Ashi in kum 39 a upa ahi hi.

2). Tancredo Neves, President of Brazil (1910-1985): Brazilian Presidential campaign abawl lai in mipiten deithei mama uhi. A campaign lai in vote 500,000 ama party apat amu ngeingei leh Pasian nasan in zong President ahina diing apat paikhe theilou diing in gen hi. Brazil President hi diing hithei phiel napi, election kuon lien in shi a, President ahina diing tung joulou hi. Ashi in kum 75 a upa ahi hi.

3). Marilyn Monroe, (1926-1962): Hollywood celebrity minthang mama in film shooting a bawl lai in Billy Graham in amanu kung a Pasian Hagau in thugen diing a sawl ahidan agen laitah in, “Na Jesu ka poimaw kha

sih” (I don’t need your Jesus) na chisan hi. Sawtlou in a lupna tung a shisa in kimu hi. Ashi in kum 36 a upa ahi hi.

4). John Lennon (1940-1980): Beatles a lasa siem minthang mamapa interview a kibawl lai in “Christianity khu abei diing a, amangthang diing. Tuami ka kinielpi ngai sih, Jesu khu hoina, hilezong a nuazuite khu tuni hun a diing in ngiem seng uh, kou ama sang in ka minthang zaw uhi” (Christianity will end, it will disappear. I do not have to argue about that, I’m certain Jesus was okey, but his subjects were too simple today, we’re more famous than him). Tami thu kigen jou 1966 in Fab Four kichite kikhenthang ua, 1980 kum in Lennon khu David Chapman in thau tawh a kapliata hi. Ashi in kum 40 a upa ahi hi.

4). BABYLON SALTANNA A KHANGLAITE: Jehoiakim vahawmlai 606 BC lai in Babylon leengpa Nebuchadnezzar in Israelte sal in pui hi. Israel tate lah apat in mi li kumpi vahawmna panpi diing in teel in aminte uh zong khel pieh hi: Daniel apat Belteshazzar, Hananiah apat Shadrach, Mishael apat Meshach, leh Azariah apat Abednego. Leengpa Nebuchadnezzar in tami

mihing lite khu Chaldean ham leh Babylon pilna zil diing in teel hi. Full scholarship mu uhi. Kum thum sung zil diing, tuachieng a leengpa nasem diing, Babylon leengpa zu-le-sa nethei diing in kiteel uhi. Hinanleh, Daniel leh a lawm thumte in ann sienglou ne a kibuasah nuomlou ahizieh un, ni sawm sung annsieng (kosher) leh tui dawn diing leh etkhietna nei diing in ngetna bawl uhi. Pomsah ua, ni sawm jou chieng in enkhie ua, adangteng sang a se-sawm a hoizaw in mukhie uhi.

A Babylon lawmte uh thangsie kisaseng un, Daniel leh a lawmte shitheina diing uh vahawm uhi. Daniel bung 3 sung ah, Nebuchadnezzar in a hausatna leh thuneina etsahna diing in ngun milim thupi mama 60-cubits (feet 90 taang) a sang leh 6 cubits (feet 18 taang) a lien khat Dura phaizang ah siem in, mipite a bie diing in thupie hi. Shadrak, Meshak leh Abednego ten leengpa thupieh zuilou in milim masang ah kuun nuomlou uhi. Tuachiin, Shadrak, Meshak leh Abednego-te khu meiphuolpi asat dan ngaina sanga ale sagi a sa meilipi ah pai in a umta uhi. Meilipi sung a apai uleh a hantuina meiphuolpi lah asat seng ziehin, meikuongin Shadrak, Meshak leh Abednego meiphuolpi a pailutte

akalumta hi. Meilipi sung a apai uleh mihing thum kipai lai mihing li apha uhi.

Nebukadnezzar khu lamdang sa sengin kintah in adingdoh a, athudohmite kung ah: “I kantom a meiphuolpi sunga ipailut uh mithum hilou ahi uoi ma?” chi in adong hi. “En vawi un, mi li phelsa a um, mei lah a vah kawikawi ka mu a, bangma achi sih uhi; tualeh alinapa melpuoh dan Pasian tapa abang hi” achi hi. Tuachi’n Nebukadnezzar in thu agen a, “Shadrak, Meshak leh Abednego Pasian phat in umta hen, Ama’n avansawlsieng ahing sawl a, Ama muong asuohte ahundoh hi. Tualeh, amaun leengpa thu asang sih ua, tualeh amaun a Pasian uh chilou pasien dang mawngmawng abieh louna dingun leengpa thupieh sulamdangin atahsa uh apephal uhi. Tuachi’n michin, namchin leh hamchin a mi koipou Shadrak, Meshak leh Abednego Pasian tunga thu hoilou gen pouma sat nen in a um ding a, a innte uh vutvum asuoh ding hi, chiin thupieh ka bawl ahi; aziehpeng tambang hundohthei Pasian dang a um sih hi,” achi hi. (Daniel 3: 19-29).

Pasian in, Ama thaunute khoikha lou diing leh a Zawlneite susie lou diing in thu ang pie hi. (Lapite 105: 15; 1 Khangthute 16:22). Jesu Krist in ang taisan sih diing a, zong ang nuasie sih diing hi. (Heb. 13:5). Aman nang leh kei ang hundam thei a, ang hundam nuom a, zong ang hundam jou diing hi.

5). THUZAWNA: Khanglai hun khu leitung mijousie kinepna leh mite mitsuon ihi laitah ahi. Kumpiten galkap diing a ang dei laitah uh ahia, sumbawltan vanlei diing a ang deipente uhi ihia, nasep neiten nasem diing a ang dei pente uh ahia, school, college leh university-ten sangnaupang diing a ang deipente uh ihia, nule-paten atha uh heng diing leh innsung vaihawm diing a ang muon pente uh ihia, nampi in nampi vaihawm diing a ang muon pente leh khangsawn nopsahna diing a ang muon pente uh ihi uhi. Tamteng sang a thupizaw, a tung a khanglai manpha igente bang a ihinana ua mite simmaw hilou a mite etton hi diing a, IH MANGPA JESU KRIST IN AMA A DIING A ANG DEITE KHANGLAITE IHU UHI. Pasian in ang hatna dawng vai.

Mangpan hing guolzawl taken,  
Amen!

# **MASADA**

- *Rev. Kamkhosoi*

A.D. 70 kum a siltung, Rome sepaiten Israel gam a sua sam na, Jerusalem a suhchimitna tah tah uh ahi. I Mangpa Jesu hunlai a a gam a opkhum mai mai uh ahia, Juda namten bangtan a ma khat zallen aanei ua, I Mangpa Jesu zong ama uh deitelna in cross tung ah ana khen beh uhi. I Mangpa Jesun anua zuite kung a Jerusalem Temple zong a siatdi thu agenlawh ma bang in, tam hun in ahi leh Jerusalem Temple siet maimai hilou in ami tengteng zong khat beh a hing a umsih uhi. Leng Herod in ana lam, metre 800 (zagiat) a sang table land, Lei ki dawsang kulpi ana lam hi. Tua kulpi tung ah mipling sangkhat vel Rome sepaite khutnuai mawngmawng a kisurrender nuomloute aum uhi. Kum tampi daiding bu neh leh tah koina, tui koina chite hoi tah in akinei uhi. Bulu khiah teitei sawm Rome galkapten duty post mun giet vel ah abawl ua, koima asuah ta umlou ding in abawl uhi. A suahta umlou dinga hing kibawl chi athei phet un, zaan khat thu in a mipling mipling um teng mi 973 tah in tha khat in gu (poison) ne in ashi sieng ta uhi.

Tualeh, YouTube ah, Saphaam Bible Dictionary te alim toh bangkim akichien mama hi. A lamdang ma khat ahileh I Bible ana kigel khah loudan, khantanhoi Johan laibu bang AD 90 vel a kigel aha. Mangpan simtu zousia Bible theibe lapna hisah ta hen, Amen.

.....

# **INNKUON**

*By:- Upa Khupsuankham*

Thumapui: Pasian in “Innkuon” ana siemna san khu “kituoh dildial” a umkhawm a, Pasian thupinate puongzah ding khu adei zieh ana phu ahi.

- 1). Leitung a innkuon siem masapen ‘Pasian’ ahi.
  - \* Numei leh Pasal akiten chieng in nupa aki chia, tua nupate khu “innkuon” akichi hi. Innkuon sung ah Pa, Nu leh ta um khu innkuon ahi.
  - \* Jesu leitung a alenlai in innkuon khu a ngaikhoh tasenga Jesu’n mi asuhdam zou chiengin na inn ah peitan chin asawl zel hi.
  - \* Jesu’n Garasen mi doimatpa asudam zou in “na inn ah lawmte kungah pei inlen, Mangpa’n nang a ding a silpha ang bawl pieh dante vahil in (Mark 5:19) chi’n asawl hi”. Na lawm leh guolte achi khu innsung mite achina ahi.
- \* Jesu’n asuhdamte a inn ua pei dingin asawl zel hi. Bangzieh a diei? I chi leh i lungkham i mangbat chienga hing henem leh ikipah chienga hing kipahpite khu ‘innsung mite’ ahi. “Koipou ama innsung buoisah mi khu akihawmkhai ding a, mihatte leh mipilte nnasem in apang ding hi” (Proverb 11:29).
- 2). Jesu’n innkuon a ngaikhawh zieh in Leitung ah ang kumsuh a, misiem ten Jesu leitunga kum 33 lah a kum 30 khu innsung ah hun azang a, kum 3 khu Pasian gam nasepna in azang achi uhi.
- \* Leitunga silpieng zousie hing kipatna khu innsunga hing kipan ahia, silpha zong innsung ma a hing kipan ahi.

- \* Innkuon sung ahoi leh Hattuom leh khosung tualeh nam sung zong ahoi hi. Hinanleh innkuon sung a kisiet leh sil zousie asesa ahi.
  - 3). Innnzah ding dan
    - \* Nupi hi'n pasal hitaleh khawlai vahhat ten thusie lasie hing puohlut in innsung ah buoina tampi apieng sah uhi.
  - \* Inn i chipen kihaua ding leh kiselna ding mun hilou in, ki itna mun, kithutuohna mun ding ahia, neh ding dawn ding aum chiengin nang nemasa aw iki chi vadiel a sep ding leh bawl ding aum chiengin kei asem masapen iki chi ding ua, tua khu innsung nop ahi.
  - \* Inn ichipen kihawmthawnna mun ding hilou in ki deisahtuona mun ahi ding ahi.
  - \* Inn ichi pen kiphawhpawh na mun ding hilou in, kipahtawi tuona mun, vang kipiehtuona mun ahi ding ahi. Mun dang leh midangte kunga i um chienga maitai singseng a um in, eima innsunga i um chieng a maitai theilou a i um chiengin innsung a buoina
- lienpi tut tute ihi uhi.
  - \* Khawlai leh mite toh ihoulim chienga houlim asiem a siem hinapi'n a innsung a tun chienga alungthah lou banga um maigum tah a lut in innsung mite toh nuikhawm vadiel theina ding leh thu leh laa te sahkhawm vadiel ding ahi.
  - 4). Innkuon thupi dan, misiem leh mipilten agente uh tam anuoi a bangin gen vai:
    - \* Dr. Deham in, innsung nuom kichi pen tate a dingin "Paradise" nute a dingin 'kumpinu' ahia, pate a dingin akumpi vaihawmna mun ahi achi hi.
    - \* Dr. Billy Graham in, innsung nuom ichi pen gitta (vatou) te leh vasate nangawn in zong nop asahna mun khu innsung ahi.
    - \* Dr. Edmundte in leitunga aguoljawlna dingin athupi pen innsung mun pen ahi chi'n agen hi.
    - \* Ellen G. Wite in, inn pen tate a dignin ngaituona kipatna

mun, khawlkhawmna mun, guolzawna kipatna mun ahiding hi. Nute in tate pen siahup (magnet) bang in ahupna mun ding achi hi.

- \* Rabbi Richard Hertoz in, innsung nop mama ding, atanzou ding, tuate innsung leh innkuon hoi na uh e ang chi ding kal a ngahla huoi pen achi hi.
- 5). Khanglai tampi suongkul taangte thu akidot chiengin anuoi a bang in a dawng zel uhi:
  - i). Innsung miten ang muon louna zieh a thangpaina zieh achi uhi.
  - ii). Phatna leh pahtawina mulouna zieh ahia, na tate pen na innsung a na pawng phawh phawh lou ding na deisahna dante itna toh limtah nou in hil lechin alampiel sih ding uhi.
  - iii). Na tate ahivang in alawm aguolte toh a umkhawm chieng in mawh phunsan

san sin, alawm aguolte toh aumkhawm chieng un zong deisahna zieh a pong hillou ding, aguolte lah a azum, seng man un na thugente zuilou in athangpai lelam kha ding uhi. Ta pilvang louten na thuhilna pen lasiem lou in asietlaw bep ding uhi.

- 6). Thukhum sin. Innkuon sung dam leh bittah a aumtheina dingin nu leh pate zong inn a aum tam deu uh angai hi. Tate leh tute ahoina ding ua iphawh tamseng uleh asietlaw thei uhi. Innsung khat a pa khat in atate leh atute aphawh tam taseng a, atapa khat in “Pa aw tamveipi nang hiltam tah ziehin chimtah huoi kasa a, luosuohhuoi zong kasa ta a, ka ngaisiem thei non sih achi hi. Leitung ‘innkuon’ Jesun innkuon angaikhawh dan, innsung zah ding dan leh innsung athupi dante limtah a melchi a zui dingin ikichel uhi.

Mangpa’n simtute zousie hing guoljawlta hen, Amen.

# PASIAN TATE TUNG A VANGSIETNA LEH THUOHNA ANG TUN CHIENGIN

## JESU EN ZING VAI

(Sam 27:13 Rom. 8:28-29).

- Rev. Dr. Hangpi Manlun  
Executive Secretary

1). THUMAPUI: Awle, itenna khawvel uh khu Eden a Adam leh Evite thumanlou zieh leh khelnate ziehin Pasian sapsietna leitung ahi. Tualeh, ei gingtute zong tam leitung khu i khuolzinna gam uh ahi chi zong i manghil sih ding uhi. Ahin, i inn leh i kuntawn tenna ding uh ahileh Vangam, Sana chi sawm-le-chini akizem ahi chi imanghil sih ding uhi. Tuaziehin, eite zousie khu i dam sung ua rapture (Mangpa) huikhuo ang hun angtun man sih leh nikhat ni chiengin ishi chiet ding uhi. Tulai a Pasian thugen tamtahte in gingtuh i hizieh ua tam leitung a vangphatna, guoljawlna leh mite sang a thupi zaw ding a, zilsahna aneit te uh khu adihna chieng um nanleh zong, tua bang ngaidan toh hinkhuo inei leh hamsatna leh buoina i tuoh chieng un Pasian masang ah i ding zou sih ding ua, melmapa Setan in solna vanzah a ang nei khah ding a zauhuoi hi. Amavang, gingtuh i hileh genthei leh liengai teitei ding china zong ahi sam sih hi.

- 2). Awle Pasian mite tung a vangsietna tungtang agente uh igen masa ding uhi: i). Pu Martin Luther in “Aw Pasian hing guoljawl in, ahisih leh hingsamsie in, ahin hingtai san sin’ chin a thum hi. ii). A.w Tozerin, “Pasian in nasatah in asuhliem masah lou in, nasatah ma in aguoljawl ngaisih” achi hi.
- 3). Vangsietna leh hamsatna ituoh in Pasian toh ang kinaish hi: Thupilte 18:10-ah, “Mangpa min khu kibutna innsang ahi a, mi dihte atailut ua abit zelzel uhi” chi hi. Tulai in, gingtuh khen khatte in, hamsatna leh buoina ituoh khah chiengun Pasian bellou in, dawithusiemte, khutlam ente,

Ah tui sante leh adangdangte kung ah itai uhi. Tambang hun chiengin, ei gingtuten Pasian ibel tenten zawh ding uh ahi.

Tualeh, khutlam etsahte, ahtui santé leh dawi thusiemte kung pou ah i tai/bel ua, ahileh adih sih ding hi. Amauhnten i natna lah ua kipanin ang damsahthei chi ngaidan i nei uh adih sih hi. A dihtahin, Ama uh ten ang suhdam uh ahisih ua, alawmte uh ahizieh ua ahat khieh uh ahi a, ahin Jesu leh Pasian miten ahileh dawi-le-kaute khu adelkhieh uh ahi. Tuakhu akibah louna leh ki khietna ahi uhi.

I Laisienghou uah Pu. David in vangsiet umtah in Uria ji toh khelna/angkawmna anei ua, Uria pasal zong atha chiengin Pasian deilou khelna ni angkawmna leh tuolthana abawlkhah ziehin Pasian thangpaina atung leh a innsung ang tuntah chiengin Pasian ma abel tenten a, Sam No. 51-khu akhelna kisiana laa ahi.

Ahin, tam bang hamsatna atuohlai in, Mangpa ma abeltinten a, mun dang ah tailou in tuachin Pasian

in akhelna khu angaidam hi. Tuabangin, hamsatna bangteng hingtung leh zong Mangpa belin akung ah i tailut ding uhi. Mangpa belte Mangpan taisan ngailou in umpi zing hi.

Ahinlah, Pu. David banglou tahin Juda Iskariot in a Mangpa dangka sawmthum a azuohtah chiengin, Jesu ang kimat a shi ding tan a, ang um chienign akisia a, asumte Siempuliente kung ah ava nua pieh kia a, ahin amauten zong ana dei non sih ua, Temple sung ah avapai/thethang a ala ua, mi zin-le-leng shite kivuina ding mun leina in akinei hi. Amazong beidawngin leitung leh Vantung in zong deita lou in, singdawn ah akikhai lum a, apawh zahta hi. Unau a Mangpa kung ah tai leh abit mai thei hi.

Tualeh, Samari mi hoi in in suomhat leh migiloute vuohgop a etkawlpa zong bitna khopi Jerusalem khopi nuasie a, Jericholam zuon a, apei ziehin suomhat leh mi giloute vuoh leh sat in aum a, Samari mi hoipa um sih leh lampi ah ashi mai ding hi. Awle, uanu

nang-le-kei zong bitna mun leh khopi i Mangpa apat i taimang leh melmapa Setan in angsoisa in kumtawn gawtmun ah ang pUILUT ding hi. Tuaziehin, unaute aw tambang vangsietnate khun i keletsahna, kithupisahna, kihausatna leh bawl thei kisahna uh leh chapoutah i um nate uapat Pasian mai i kunna ding uh ahilam manghil sih va ui. Pu Larry Craffin, “Na neiteng abei a Jesu maimai khu na nei sun ahi chi na thei masangin Jesu maimai apawimaw ahichina thei sih ding hi” achi hi.

- 4) Hamsatna leh Vangsitna in Pasian loupina ipuoh zahna ding uh ahi: Vangsietna leh hamsatnate khu achil in hamsa leh beidonhuoi lehzong Pasian toh i pankhawm leh Pasian loupina kilahna ding ahi. Daniel leh alawm thumte khu achil in vangsiyah ahi ua, a zieh ahi uh leh Babylonten suoh lah sal in apui uhi. Ahin, a Pasian (Jehova) uh abel chinten ua, agin um zieh un, tuni dongin Daniel laibu gel a um in, zu-le-sa anehloute uh khu tuni dong in Khanglaite hanthawnna akizang den hi. Tualeh,

Leengpan Dura Phaijang a Milimpi beding a, mizousie thu apieh a, akun chiet lai un Daniel lawmthumte kun lou in akunloute Meilipi apailut ding a thupieh ahilai un, kumpipa thupieh leh Meilipi na en le uh zauna in adim un akun maithei uhi. Ahin, ka Pasian un hing hunkhialou ding hilehzong ka kun sih ding uh achi uhi. Tuachin ale sangi meilipi khu asasah ua, atop ah mi thum apai uh leh a muon leh abel uh Pasian in Meilipi sung ah anangah a, tuachin Meilipi sung ah avah pi a, mite lamdangsa leh amauhte ziehun kumpi/leengpa nasan in Daniel leh alawmte Pasian khu Pasian hing leh bietah ahithu a puongta hi.

Tualeh, buoina leh hamsatna Israeltaten thuoh sih leh uh Esther leh Nehemia laibute a kigiel sih ding hi. Pu Job in vangsietna na tuoh sih atate leh a nei alamte abei a, Ama zong uilut in apumtuom a, ajina ngawn in a Pasian samsia a shiding a asawl lai in - gin umtahin na umsih leh anu-a guoljawlna zousie a tang sih ding a, eite a dingin ettawn leh kihantawhna in i zang sih ding uhi. Sawltah

Paul in, Rome suongkul (Jail) ah na tang/kikhum sih leh Phillipite, Kolosate, Ephesate, leh a laibu dangdangte agel lou maitheih.

Pu. John Milton, khu khuo mutheilou a, amit ang tot (blind) chiengin khawvel a laibu hoitah leh minthang “Paradise Lost” chi laibu ang gelkhia hi. A.W Tozerin, tami laibu khu Vangam ah zong kisim va achi va-ia hi. Tualeh, Pu John Bayan khu mi jawng leh genthei ahi. Kum sawm-le-li (14) vingveng Beford suongkul a, atan sung in Khristian khuolzin chi agel khia hi. Tami khu khawvel a laibu hoitah ahiban ah, khovel a laibu mite deipen Bible kithotna mu zosie ah atung hi. Tualeh, Mizo hamin 20-vei reprint bawl ahita hi.

Tualeh, Fanny Crosby, kum guh aphah lain, doctorpan damdawi apiehkhiel a mitte gel taw in (blind)- a, adamsung in khuo amuthei sih hi. Nikhat anu kung ah, nu kei bang ding a, kamit taw e chin hasiet tahin adong a, anun bawi Pasian loupina ding ahi chin a dawng hi.

Tuachin, lungkelou in Pasian abel tinten a Kum 10-ahi in, Genesis to Number leh Mathui to Johan tanpha abawnuna byearthi. Tuaban ah, aman la 8000-valtah aphiuh hi. Asusietu Dr. pa zong angaidam hi.

5) Hamsatna leh buoia i tuoh lai un Manpga Jesu i en zing ding uhi: Stephen khu gingtu (Christian) martyr masapen ahi. A unaute leh khoten suong a setup ding a, a kisahlaiun amapan akim-apam en in, adiehin a nuoilam ahan ding bang enta leh a beidawngin zauna in a pumdim ding hi. Ahin, van lam a ettah cheingin, Pasian tahlam a Jesu ding khu amuta hi. I Bible un Jesu khu Pasian tahlam a tou, a chilai in, a misiengthou ginna a mihangsan shiding hagau na lamdawn dingin Jesu khu ana ding ahingei ding hi. Nidanglaiin, tang thu khat tambangin a kigen hi. Mi pawl khat lenna tung ah a tuong ua, vangsiet umtahin a lenna uh ang buoi hi. Mizousie a zau un a kikou uhi. Ahin, a gei ah pasal naupang khat lungmuong tahin anatou hithiet hi. Miten, “Boi nang

i lenna buoita a bang ding a, zaulou leh lunghimaw lou a, nana touthei mai chin a dawngta uhi. Aman, i lenna hehtu (pilot)- khu ka pa ahi a, ama khu lenna hehsiemtah ahi a, tuaziehin bangma i chi sih ding uh chi kathei ziehin ka zausih a kalung a muong mama hi” a chisan hi. Aman, apa a theichet ziehin lungmongtahin aum thei bangin, Pasian lam i et zing u’leh hamsatna leh buoina

i tuoh chiengun i hamuong ding uhi. Mangpa’n simtu zousie athatha in hing hamuonin umpi zingta hen aw!!!.

(**Note:** Tam article gelna ah lawmpa Rev. Dr. Dongthong laibu “Tui Kha apat Tuihum Khuolzinnna” leh laibu tuomtuomte et ahi a, ahin sermon type ahziehin chiengtahin/detail in kang tahlangthei sih a simtuten nang thei siem uh kang ngen hi).

## SUM NA ZAH MASANG IN NGAITUO IN

- Pastor Rawna Kopsiam

### 1). Thumapui:

Miteng in suipen a inei uh leh umlou a i um thei votlou uh khu sum ahi. Americate’n a sum uah ‘In God we Trust’ chi giel uhi. A sum uah hilou in a Pasian uah muonna koizaw uh ahi chi khovel a thei sahna uh ahi. Indiate sum ah vang tuobang thu gel a um sih hi. Hilehzong lim tuong pen in gennei mama ding in ka gingta. I gensah ut a kibang khawl sih ding. Mahatma Gandhi hi dihtatna ngaina mi, zuougen theilou hilou in zuou gen utlou ahi zaw. ‘Imitating the English gentleman’ chi tangthu a pan in a muthei hi. Sum ah dihtatna apoimaw khopmai a, tuozieh vel adieie maw sum lim a, a tuonsah uh chi ka ngaituo khazel hi. Tami lam sau genlou in, sum i zah ding chieng a i sum zah dih dingdan khenkhat i genkhawm ding hi. Hing guolzawlta Pasian thei gige kawm in na sum zang in.

### 2). Na dei ahi ei ahisihleh na poimaw:

I van leite uh khu a tamzaw i deizieh, i etlahzieh, hoi isah zieh bang ahitangpi in kathei hi. A poimaw zieh sang ma in zong aman

a tawmzieh bang hinuom nalai hi. Innvengte'n nei ua, va neilou tuom ding utlou zieh bang. Tamte khu i sum nei sunsun uh manthaina khuhpi a paikhiet toh kibang giеп hi.

3). A Etkolzui nading nanei diei:

Cellphone lei ding maw?  
Ahoi e, ngaituo zui dia hoi khu na chawm zou na diei?  
Na leini apan na chawm tou charchar ding himai. Sum muna umlou, a senna lam ngen hing hi ding ahi chia.  
TV zong maw cable join man kiseng charchar mai chi aw. Bike thah leisawm zel maw? Na haw utna mun minute tamlou sung a tungpai thei ding na hita ve. Tami zong sum muna lah um mama lou, asenna ngen hing hitou charchar ding, petrol mantam lam na ngaituo ngai ei? Na Computer lei khu game kimawlina ding mai in chu a man a tamthou maw.

4). Akoina mun ding la: Car tha leisawm maw? Hei a koi ding? Na innvengte adia nawngkai loudeu ding in aw. Eh! Voh khawi sawm maw? Voh khawi meet

vanglah hi e maw. Hinanleh innvengte'n gimsie asa kha ding uoi? Na Voh leh nang a khawitu niteng a na innvengte hamsie leh hamkam hoilou zah gige nang mai ahikhah ding pilvang in. Nang khawilou a na innvengeten khawi hile uh gimsie nasa taluo khamai diei maw. Innvengte toh kituohlou khu nuomlou luo hive aw maw.

5). Heimun a valei sawm la:  
Nami leh nasate dawr ah zong umthou ngal bang dia kol leh vaite dawr vel vazuon sese. Sum nanei chia bang dia abat a zong hing pe gigete dawr a valei sahlou se na hiei. Sum nanei lou chia lah amau loungal hing hepitu ding umlou hi a maw. A van kibang thou, amantawm dan zong kibang thou ahinah leh hasatna leh damlouna, shi-le-man na tuoh hun a hing vepha dingte a valei sah zo maize. Azau zodeu in i theisiem semna ding in siemsinna toh kisai in gentalei Lamka pulam a siemsinna a sum leh pai i sen khiet tengteng uh Lamka khuo sung a seng hi lei i sum leh pai sente uh a dongtu eilawi ma hiding

- hi hang a maw. Kolgam a i sum sente uh kolte hiveh aw maw ana hamphat pi zelte khu. Lakh tampi nei nanleizong i sum kiveina i gamsung ahi khah sih leh pen i khangtou zou tahtah sih ding hi.
- 6). Na sum zahsawm khu koi a ahiei: Van nalei ding chieng in na sum tawipen koi a ahia chi ngaituo masa in. A ditkiana ding mumal neilou in vang midang sum zang da mai in. Bat a vanlei chite zongsat lou ahoipen a, suotatna chikhat ahi. Na hichi sihleh koi e khat khut ah saltang nahi chi kithei ahoi hi.
- 7). Amanphat dan na sut ngei ei: Na vanlei manphatna leh na sum sen manphatna a kibuh huntawh in na thei ei? Na van leina zah manphat dan leh na sum sen manphatna dan a kituoh chet ahileh amanglou na hi ding a, na sen toh te a na zahna lam manpha ahileh a lawh mama na hiding hi. Van man tampi a lei in na sil lei leh azahna thupi senglou ahileh khu amang/asum mama nahi chi kithei in.
- 8). A phattuompi ding lam in: Laibu, Cassette, Calendar leh panpina dan a van kizuahte a zuohtute zatat man vel a leisah maimai ahi ut mama hi. Na deiseng loupi ahileh, na leisahtah vanglah leh midang dei mama, a lunglutpi mama te lah a neikhalou, a lei zoulou dia na gintatte a thawn in pe sawm lechin, inn a nakoi maimai sang in nahpitah in manpha in phatuam zotham ding hi.
- 9). Na phattuompi na ei: Na washing machine lei na phattuompi ei, thada pi giap na hileltah leh na light bill lah a tamtuom mama ding a, Na TV uh pen innkuon kiselna giap ahi ei? Remote kitu a ka vengvung na lel ahi ei.....? Innsung van ding i lei chieng in sum nei zieh himai lou in a poimaw zieh hithei zel leh maw.
- 10). Sum bangza nanei lai ei: Na vanlei bangza man chi sang a poimaw zaw ahileh tua na lei nukhia/nung in sum bangza nanei lai ei chi ahi. Na nei lai za apat in na changkan leh changkan lou nang na kithei mai ding.

Na sum lawkhiet tampi ahi maithei, hilehzong tuasang a poimaw zaw ahileh tampi sen sang in tampi khol a bit huoi zaw hi.

11). Sum zatna toh kisai thupieh 10-te:

11.i). Sawm-a-khat Pasian pe masa in. 11.ii). Na lawhkhiet sang a tamzaw zanglou ding in pilvang in. 11.iii). Bat a lah himhim khemna ahi chi thei gige in. 11.iv). Sum muna leh zahna bikhieh inlen, zui teitei sawm in. 11.v). Van alui leh athah leikhawm zel ding in geel in. 11.vi). A henna ding lei gige sang in alui bawlhoi a zahsawm ding ahi. 11.vii). Na neisa ah lungkim sawm in. 11.viii). Nang sang a genthei zote panpina ding in na sum bangza e zahsawm teitei in. 11.ix). Na sum neisunte kembittu ding in Pasian chiel inlen, a guolzawlna ngen in. 11.x). Sum ah muonna nga/koi sinlen, Pasian muong inlen sum dihtah tah in zang gige in.

12). Ka neulai a ka sil tuohte: Ka naupan lai in singtang khuo khat ah ka teng uhi. Ka nu leh pate Lamka lam ahaw

chieng un ka puonah ding, ahisihleh ka tawka ding hing leisah un chin kivaihah zel hi. Ahing tun ding uh kingah la taluo himai. Nu pa nang lei uoi i chi chieng a, A zuohna lam vapei kha lou chi uhi. A khen chieng a na puonah ding kolten bawl nailou uh chi uhi. Enlah vapei khalou ahiei, kolten bawlnailou tahtah bang kisa tamai hi. I hing letdeu nua chieng a i hing thei thatha leh tualai a ka nu leh pan van leinang sum ana nei mama lou uh, neilou achikhiet ngamlou zieh ua suonlam bawl maimai ana hilel tah uhi. Nu leh pa kung a ut leh deiteng khosahna ding geel banlou a, ana ngetnget tehaw mot leh zumhuoi bang sah khonua in a um a, kisuonla huoi tuntun hi.

Akhen chieng lou kuon ahing tung ua, pa nehthei nang puoh ei chi a va kibaw pai zel. Tawlnou kang puo hi chi uhi. En ganhing khat bangsa in kimu nuom luo, A thungpi sung bang uh etkal kingahla himai. I hing thei thatha leh ei hing khuolna uo nnasem tawl seng uh ahi chi a genna uh anahi. Zum huoi thei seng, tambang lawmlawm a na kimaw

talawm lawm. Nu leh paten sum bang ana neideu hile-uh vang i poimawte hing leisah nuom talaw ding uh hia chi theikhiet tha in um zel hi.

Ka hing liendeu ta a, neukhet kisuonlana dan kithei deuta khu himaithei. PU Science ka zillai in, nikhat ka nu kung ah nu ka practical note bu ding leingai ka chileh, anih za-ip hing sawh suh a, Rs.20/- note khat hing lakhie hi. Ahing pieh kawm in, i innkuon ua i sum neisun uh ahi. Poimaw ahileh vazang in hing chi hi. Ka mittui a hing luongsuh a, ka gong ahing bing gawp a, ka hamkhe zou nonsih hi. Awl in ka hamkhethei a, nu i sum neisun uh zang beitu in ka pang sih ding ka chikhe thei khong hi. Ka innkuon dinmun uh ngiemlaw mama ahi chi kathei chieng in college kaisawm chibang zumhuoi hielin ka ngaituo hi. Nu College kakai non da mai ding a, ka pa leh ka ute kilawna ah ka vakuon zoding ka chi nilnel hi. Ka nu'n khun hitalawm lou e, napa leh na ute a hing kilaw thei zel nah uleh sum khu hing umzel mai ding ahi chi in hing henem hi. I dei lei nang guohlou a, i poimaw tah leinang zong hing umlou chieng tahtah in vang, "senguol toh tanbang kim in kei hing siem aw" chia Lengtong Pauno lasah bang lungsim ah hing

lang vengveng mai hi. Nu leh pa mangbat dan ding geel phalou zen a ut teng, deiteng bang kana ngetngat gige ka kisia taluo a, ka nu leh pa damlai hile uh ngaidam nget tha hiel bang ka ut mama hi.

Ka college kailai leh Bible zillai hun bang a kideh zoulou a kabieng a mittui hing luongte lawmte hing muman ding zau a buoitah a ka um zel hunte bang dang zieh hilou in tam sum leh pai tahnip zieh vel ahideu tangpi hi. I za-ip sung sawmkhat sawmni vel a umlai a khu kanei sih chi vel kigen ngam lai in chin, i za-ip hing hawm tahtah bang khu kanei sih zong kichi ngam non votlou hi. Ahi a neilou chi gige bang zong hing zumhuoi seng hun bang hing um zel nalai. Auto tuon man ding neilou man a excerise lakawm chidan deu a keng a dakal khat vel nisa nuoi a kapai kheukheu vel ka mangngil thei mama sih. Lawmte thei dan a khu excercie la, eilah sum neilou zieh ana hi khinkhian hi.

Tua ka sepna ah sa ka memun mama mai ua, ante me lunggul tuntun ni a tam mama hi. Bible College ka kailai a lawmten sa meni chi a ann nehkak a ngahla mama lai ua, ann a neh kal ua, annngawl thumna nei a mittui naptui toh hun ka zahlai vel bang

ka thei thatha zel hi. Lawmte khat bang in pa Rawn, sa mehni tata vel bang in ann na ngawl zel a nidang deu in zong bawl maive hing chizel hi. Same hing deisah mama zieh ahi chi kathei siem mama hi. Kei zong same du mama napi a poimaw kasah zieh a annngawl thumna kanei ahi chi ka mangngil theisih hi. Ka neu lai a ka pan, ‘nehtam na ut leh netawm in’ chi a agen zel bang ka thei thatha a, dih kasa mama hi. Tu in khu sa kane mun mama tamai hi. Tuahun lai a ka nehtawm pen tua Mangpa’n tampi netheita dia hing guolzawl ahi ding hi. Mangpa min phat in um hen. Hasat hun leh lungkham mama hunte hing um zel nanleh ka Pasian tung ah ka hase (vui) sih hi. I hoina ding un

bangkim a guotkhol zel chi kathei ziehin. Tam bangkim in ahoi leh a nuam lam mai hilou in ahaha leh nuomlou tampi zong tunkhawm ngala, tunkhawm kha sihleh lah bangkim hizou lou zel ding. Pasian min phat in um hen aw.

(**Note:** Tami article khu Pastor Rawna Kopsiam in, ZPYF Diamond Jubilee souvenir a, a gel khu tulai igam a Covid-19, zieh a neh-le-tah suina (economics)-lam a hamsatna i tuoh laiua Pasian guolzawlna i tan bangbang uh sum-le-paite i zah siemna ding uh lunggelna leh hamsatna hun ah zong lungkialou a pang a, thumten lawchinna atan dan uh testimony dan in ngai va ui. Joint Editor Khristian Tangkou).

---

## MANGPA KUNG AH KILEKIA VAI

(Isai 40:29-31; Luk 15:17-24)

- Rev. Awnkhankhup

**K**UM 20/30 peisa hunlai a chielpi -Crusade leh Revival khawmpni tuomtuom a kinei zelzel laite, houtupa Rev. Chungthang Thiek leh Pu Thonkhansuan te vel zang a Pasian in ahing ve hun laite i ngaituo chieng in, lunglen huoi phielphiel hi. Tuahunlai in mimal leh Hattuom in eima phah na chiengchieng a lungkim theina leh Pasian gam a ding a kiphalna tah khat kinei in, tua khu a nopna leh a ngaihuoina hi in akilang hi.

Jawlnei Isai in, gingtute lah a ba hun leh hatlou hunte hing tung thei zel ahidan, Khanglaite nangawn a gim un, a ba ding ua, hinanleh Mangpa ngahte pen ahatna uh siemtha a um in, Muwanlai bang in ha in a leengtou ding ua, a ba sih ding uh chi in ana gen hi.

Muwanlai tangthu tambangin akigen ngai hi. Kum 40 a phah chiengin a keng chinte hing hatlou in bangma lenkip zou lou in ahing um a, amuh zong molta in zah tahlou hing suoh ta hi. A hate gih sengta ahiman in deibangin lenpi zouta lou a, a awm a multe zong kibel gawp in gamtat hasa sata hi.

Tambanga shithei ding dinmun a ahing um chiengin, Muwanlai in pan hing la tha in, hasa sa kawmkawm in muoldawn a leengtou in ni 50 sung kihenna nei dingin va kikhum bichil hi. Amuh suong taah tah a taat in, aluipen akieh a atha a pou matan pan ala hi. Tuachin a muh tha toh akengchin luite tukhie in, chin tha a pou ding angah hi. A kengchinthia hing pou te toh pangkhawm in a awm abeh a mul sapite ahingtu khe thei kia hi. Tam bangin ni 150 sung

in Muwanlai in halthana leh kihenna thupitah nei in kum 30 dang hinkhuo mang dingin tangdawn a kikhum bichil na apat ahing kumsuh kia zel akichi hi.

Ganhing leh vasate bawn in tambang a hinkhonuom zaw leh manphazaw manthei ding dan thei siem a, anuom leh ahasa gen hetlou a, thuoh ngaite thuoh a, ngah zou ngaite ngah zou a hatna tha anga thei uleh, Pasian ta ei piengtha, Khrist a hinthia nei te a ding in ngaituo ding tampi um thei ding hi.

Khantanhoi Luk 15na ah Tapa taimang gentena thu i sim uhi. A pa nei leh lam sate ne leh dawn a, akhut nuoi a um zong ut nawnlou in, ama utdan dan a um ding utzawh ziehin apa inn pawtsan hi. Bakhat sung, ama deibanga nuomtalna in nuomsa bangin kilangsah nanleh, a nopsah hunte in tomkhat zong dailou in, noptatna apat tahsapna, tahsapna apat chimohna leh beidotna huoisetah atun ta hi. Apa adinga tapa duot mama pa pen, ittu ding neilou, gilkiel a shi mai ding dinmun ah hing ding zom paita hi. A hamphatna

mama ahileh, ngaisaktu ding a neilouna tah in, a it zing apa geeldoh sah thei a, Vohkuong bul apat pa inn a nehsenglou ann umte hing ngaituo phaban ta hi. A dinmun sietdan leh a pa hausat dante hing geelkhie a, a umna mun apat thoukhie in a pa kung hing zuon thei ta hi.

A pan gamlapi apat ana galmu in a lainat mama a, ana del a, ngawngkawi in atawpta hi. Chingkisalou tapa taimangpan chinglou a kisah dan gen a thupha atawi lai in, akilekia kal ngahlah tah a na ngah zing a pan deisahna lien penpen toh pom in, hamphatna atan thei ding zousie siit neilou in a pekhia hi. Tapa khat in a nei ngeingei ding a kisam vante bangma nei nawnlou ahiman in a pan en zoumama lou ahi ngei ding a, puontuol hoipen silsah in, a khut ah khutsip bul sah a, a keng ah kepdap bunsah hi. Puon in ngaidamna bukim ensah a, khutsip in ta hina thuneina ensah a, kengdap in innsung mi hina ensah hi. Suoh pouma ten kengdap bun ngailou ahi zieh in tu in vang, ama kinepna sang a sangzaw tapa ahina dinmun ngai

mama piehin aumta hi. A pa kung a kilekiate hampha hina mai zen uh e.

Tapa taimangpa kigen bang in, tulai gingtu tampite nuomtat utna leh eima thu a zalen taha um utna in ahing zou mama maita hi. Tam bang i zaleenna hinkhuo in sawtlou sung in tahsapna leh beidotna ah hing zawpi in, ahing ittu Pasian lam zawt nah sang in khovel silte mama ah itai lut zel uhi. Jawlnei Isai in, ‘Kamiten sil hoilou ni abawl ta uhi. Keihinna tuinah ahing nuasia ta ua, amauh tuikhuh ding a kitaw ua, tui neithei louna tui kuong sesa a bawl uhi’, ana chi bang in (Is. 2:13).

Tuaziehin unau it, khovel a sil tung zelte leh eima hinkhuo a ituokhah silte ngaituo zel kawm in, Pasian kunga kilekia hun mama ta ahi chi geeldoh tha va ui. Pa angitung taisan a ut dandan a um pen suohtatna hizawlou in, suoh a lutna ana hi zaw hi. Hing ittu angitung a kilekiana ah suohtatna tahtah um pan hi. A hin ittu pa toh tengkhawm a, ama itna nuoia thumang tah a um khelkhel a nuomzaw bangma dang umlou hi.

**ZPWF COLUMN:****September 02, 2020 to September 24, 2020 tan a Tunnu  
Limbel panpina pete:**

1. T. Chingngaichiin, Lailam Veng	Rs. 200
2. L) Pi Thangneivah, Lailam Veng	Rs. 1,700
3. P. Church Muollum, Tunnu Limbel tuohkhawm	Rs. 590
4. Nianglamching, Tuining	Rs. 1,000
5. Ngaizaniang, Manniang Khuo	Rs. 300
6. S. Niangngainiang, Mission Veng	Rs. 1,000
7. Chinmuankim, Central Church	Rs. 1,500
8. Upa Goumang, Central Church	Rs. 2,000
9. Nu Nousuanching, Central Church	Rs. 500
10. Tv. H. Hauminlian, Imphal	Rs. 200
11. Upa Thangsankhup, Tuibuang	Rs. 1,000
12. Nu Hatneikim, LDCC Hiangzou	Rs. 1,000
13. Nh. Nianglunching, Zoumunnuam	Rs. 200
14. Nu Donneiching, Central Church	Rs. 500
15. Nu Mannianching, Lailam Veng	Rs. 1,000
16. MLA Pu TN Haokip, Chana Bag-1 leh Anntang Bag-4	
17. UZO General Headquarter-Sweet packet-1 leh Anntang Bag-4	
18. PWF V. Bethel, Anntang	Kg. 50
19. PWF Central Church Anntang Kg. 183 &	Rs. 1,350
20. PWF T.Daijang, Anntang	Kg. 50
21. Nu Suanching, Zomi Colony	Rs. 200
22. Nu Ngailian, Zomi Colony, Biscuit 6 Packet	
23. Mandeiniang, Zomi Colony: Baal-Kg. 3, Annjang Kg. 3, Mai pum-5, Singthupi lom-2, leh Singjual lom-2	
24. Jacob Khupgoumuan & Family, Zoumun : Atapa uh Joab's Birthday na a Tunnu Limbel naupangte nehthei nehpi/pie	

**Tangkou September, 2020 issue (ZPWF Column) a suoh khaloute:**

1. Bishop S.K Manlun, Zomi Colony = Dal - 1bag
2. PWF LDCC Hiangzou Anntang = Kg. 100
3. Nu Ngaineiching, Buhsau, Tangmai = Pum-30
4. Upa M. Dongzalam, Chief of Zomi Colony-PMGKAY Anntang Kg. 75 & Chana 3kg

Petu zousie Mangpa'n ale tampi in hing guolzawl semta hen aw!  
Adihlou khate Office a suhdih theizing ahi.

---

## PATRON MEMBER-TE

---

1. Upa Gouzamang	2. Pu Hav. Khamchinkhup	3. Pu Khamzalam	4. Pu Chinzasuan
5. (L) Upa Liansuanpau	6. Pu Khamchinthang	7. Pu S.Dalthang	8. Upa Kapkhanthang
9. Upa Langginmang	10. Upa S. Nangkhanlal	11. Pu S. Lamkothang	12. Upa Dr. M. Lachinkhai
13. Upa Khamchinjam	14. (L) Upa D.K.Manlun	15. Upa Suankhanmang	16. (L) Upa Khupgou
17. Upa Chinkham	18. Upa Ngulchinkham	19. (L) Rev. V. Vungzalian	20. Rev. Retd. Kamkhosoi
21. Rev. Retd. Tualzachin	22. Rev. (Rtd.) H. Nengzatun	23. Rev. Awnkhanhup	24. Rev. Dr. Hangpi Manlun Zou
25. (L) Pu Tuanzapau	26. (L) Rev. Ginchinjam	27. (L) Rev. Khamzasuan	28. Upa T. Lamkothawng
29. Upa Khaichinmang	30. Rev. Stephen Chinzhathang	31. Pu Khupkhanmang	32. Pu Khaidohlian
33. (L) Hav. Khamzahang	34. Pi Vungzuanum	35. Pu T. Gouzadou	36. Upa Liensuonkap
37. Pi Zelkhochin	38. Pi Hatkhanvung	39. (L) Pi Ngaihoiching	40. Pi Mankhannieng
41. Pu Goukhanmang	42. Pi Chingzalam	43. Pu S. Thianzakhai	44. Pi Kamkhanching
45. Pu Haukhanpau	46. Pu Tuallianmang	47. (L) Pu Dongkap	48. (L) Pi Chingkhanmang
49. Pi Donkhonian	50. Upa Henzakup	51. (L) Pu Saichinpau	52. Pu Goumang
53. (L) Upa Khamkhanhang	54. Shie Laangkhanlal	55. Pu Khamkhanlun	56. Upa L. Tualkhanpau
57. Upa Jamsianmung	58. Upa Ginzadong	59. Pu Kaizathang	60. Pi Goizanuom
61. Pi Thangneivah	62. Pu Khamzathang	63. Pi Donchin	64. Upa Liankhanmang
65. Pu Hauchinlun	66. Pu T. S. Lal	67. Pi Goichiin	68. Pu T. Khupchinthang
69. Upa T. Kaizalam	70. Pu Paul Henkholai	71. (L) Pu Soikham	72. Rev. P.C. Manga
73. Rev. Khamchinkhai	74. Rev. Jamlianpau	75. Rev. Chinzapau	76. Rev. Retd. Kamkhozam
77. Upa (L) Chinpu	78. Pu Zamkhanthang	79. Pu Chinglen	80. Miss Chinhaunieng
81. Upa P. K. Soia	82. Pu Goukhai	83. Pi Niangkhanmang	84. Evan. Retd. G.L. Joshya
85. Pi S. Chingkhanmang	86. (L) Pu Vumchinkhup	87. Upa Khaihenthang	88. Upa T. C. Pau
89. Upa Nengchinkap	90. (L) Upa Jamkhongam	91. Upa HT Manga	92. Mrs. Vahkolhing
93. Pu Hauliankap	94. Pi Chinnu	95. (L) Upa Ngulzakhai	96. (L) Upa T. Gougin
97. Pu Ginsuanhau	98. Upa (L) Langminthang	99. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thathang Taithul	104. Pu Kamkhankap
105. Bhim Prasad Ghatani	106. Rev. M. Kapsuanthang	107. Nu Chingneikim	108. Rev. Khupkhanhsuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. Rev. (L) Mansuanthang	115. (L) Pu Lamchinhau	116. Upa Pauchinlel
117. Nu Kimneihoi	118. Upa Kamgenpau	119. Nh. Nianguannuum	120. Nu Ngaikhunvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. Upa Lunchinthang
129. Pu P. Tongthang Zou	130. H. Nehzamang	131. Pu Thangsunkhup	132. Upa M. Kamzadou
133. Pu Jamkholian Munluo	134. Pu Sianzakhai	135. Upa Thangginsuan	136. Pu Kapminlun

---

## LIFE MEMBER-TE

---

01. Upa (L) T. Khupkhenpau	02. (L) Pu M. Ginzahau	03. (L) Pu Selzapau
04. Pu L.C. Pautungnung	05. (L) Pi Khamkhanlieng	06. Pi Ngainuom
07. Upa Chinsuanthang	08. Upa Shanti Kumar	09. Pu Kamkhohau
10. (L) Pu Khamkhohau	11. Upa Khamzathang	12. Upa Chinkhanthang
13. Pu (L) Tongzathang	14. Pi Chiinneilam	15. Upa Kulthang
16. H/Sm. Upa Kaichinpau	17. Pi Niangzalam	18. Upa P. Doukholun
19. Pu Kapminlian		

*I undelivered*  
Please return to:

*The Editor*  
CHRISTIAN TANGKOU  
ZPCS Office, Zomi Colony  
Churachandpur - 795 128  
P.O. Box - 48, Manipur, India  
Synod Office Telephone No. (03874) 235105  
Website: [zousynod.org](http://zousynod.org) | email:[info@zousynod.org](mailto:info@zousynod.org)  
[zpcs@rediffmail.com](mailto:zpcs@rediffmail.com)/[zousynod05@gmail.com](mailto:zousynod05@gmail.com)

7a.

---

---

---